

卮林卷之八

莆田周 嬰方叔纂

諡胡

王褒

胡元瑞玉壺遐覽云漢有二王褒一字子淵武帝時人卽上聖主得賢臣頌者末謂奚必偃仰屈伸若彭祖吹呿呼吸如喬松哉蓋諷武帝之學仙其識趣非道家者流也一字子登元帝時人遇華山異人得道至王屋山號清虛真人然後漢郊祀志又有王褒姓名非武元二帝歟文學道術顯者是

漢自有三王褒也又後周王褒字子淵亦能文章
工詩詩藪曰北周文士王褒爲冠西漢王褒同姓
名同以才學顯世所共知以予攷之古今有五王
褒一唐人字士元亦能文卽補傳亢倉子者一見
漢郊祀志一見神仙通鑑

諡曰漢書宣帝時修武帝故事益州刺史王褒奏王
褒有軼才上詔爲聖主得賢臣頌云云是時上頗好
神仙故褒對及之本傳甚明胡氏以爲諷武帝誤哉
又漢書爲郊祀志東漢書稱祭祀志云後漢郊祀志
何耶郊祀志云神爵時遣諫大夫王褒持節求金馬

碧雞之神此卽子淵傳中語惟五行志成帝綏和二年鄭通里男子王褒衣絳衣帶劒入北司馬門上前殿入非常室中解帷組結佩之則又一王褒耳三洞珠囊曰王褒字子登前漢王陵七世孫服青精飢飯趨步峻峰如飛鳥無津梁直渡積水又服雲碧晨飛丹腴視見甚遠太上道君賜王君素明瓊紋玕丹錦旌號清虛真人神仙傳同茅君傳曰清虛王真人漢元帝時辭家入華陰山九年又登陽洛山平帝時修行道成太上賜錦旌爲太素清虛真人又集仙錄茅盈字叔申王褒字子登張道陵字輔漢皆朝王母於

崑陵之闕按旣云前漢七世孫又云元帝時道成又
云與道陵同時則非武帝時人矣但周書王褒字子
淵爲梁元帝尚書左僕射江陵陷入長安仕周封石
泉縣子然梁書作字子漢也魏時亦有一王褒博物
志文帝黃初三年武都西都尉王褒獻石膽二十斤
晉時更有二石褒王隱晉書曰王褒字偉元

○孫云案偉元

名裒裒裒古字通

少立操尚以父儀爲司馬文王所殺絕世

不仕霍原傳云原與王褒等同以賢良徵也晉書又
曰元帝鄭夫人妹適長沙王褒帝召爲尚書郎隋亦
有一王褒北史宇文述討蕭瓛瓛遣王褒守吳州述

遣兵襲襲衣道士服棄城遁按胡氏得五子得其
入而路史發揮曰王褒有十一人九見前錄一漢鑄
工見孝成鼎一真人自有內傳

洪崖先生

玉壺遐覽曰洪崖先生傳云洪崖先生者或云黃
帝之臣伶倫也得道仙去姓張氏堯時已三千歲
矣陶弘景真誥云洪崖先生今爲青城洞真故青
城山有洪崖洞司馬天師五岳朝儀云青城山洞
周回二千里昔洪崖先生服琅玕花隱去代爲青
城真人据此則古洪崖治青城山甚明然傳又云

洪崖山在豫章之西山有仙壇臨井上爲洪崖煉
丹處五春日色渥如丹各圓深二尺餘爲洪崖煉
丹臼則又似言豫章何耶蓋青城爲古洪崖所理
無疑而豫章則唐張氤先生隱處也或疑洪州是
開皇時改號在唐前然則豫章固舊有茲山張氤
隱焉而井曰則氤之遺跡無惑也設帝堯前安有
張姓其謂張姓者斷因唐之洪崖而訛矣

諡曰雷次宗豫章記曰厭源山西北余侯村五六里
有洪井俗說洪崖先生之井又謝莊有遊豫章觀洪
崖井詩水經注曰散原山西北五六里有洪井飛流

懸注其深無底舊說洪崖先生井也西有鸞岡洪崖先生乘鸞所憩泊也梁元帝吳平侯誌曰遷豫章內史洪井鸞峰甘露歲下簫崖鶴嶺連理城陰古洪崖托跡豫章審矣安得以井曰屬唐人按集仙錄晉武帝時豫章吳猛許遜居洪崖山築壇立靜傳所云仙壇臨井者豈吳許所築與而太平廣記引逸史萬年縣南山有洪崖澗則不止青城厭源也又真誥曰春琅玕之華而方營邱墓者洪崖先生也洪崖先生墓在武威姑臧縣則姑臧又爲先生尸解地安往不化何必青城哉然郭有道碑云將蹈鴻崖之遐跡陶邱

一薦管寧曰追跡洪崖參踪巢許則似爲隱士西京
賦曰洪崖立而指麾薛綜曰三泉時伎人則祇爲伶
官與升仙者豈別一人乎陳子昂詩序曰鸞鳥篇者
晉人洪崖子作也洪崖子矯迹汾水乘白驢衣羽褐
云云按張氲奇晉州神山縣洪州大疫氲來施藥病
者立愈玄宗驛召之果氲也常服紅蕉衣跨白驢此
與伯玉所敘合氲時一至豫章耳安用鍊丹井曰爲
然能和墨灑翰則張洪崖亦一文人

王喬

玉壺遐覽曰王喬尤易舛淆古今未有了此者楊

用修王元美卮言俱以爲有二人余別考得三人
自謂足據近復憶之誤也仙家王子喬傳子喬卽
太子晉字子喬一云名喬字子晉遇浮邱公授以
至道於緱山乘鶴上昇時人觀者咸曰王子登仙
遂言曰王卽吾姓因遂稱王子喬并葉縣爲令飛
舄之王喬柏人爲令食芝之王喬其爲三人無疑
余舊嘗載之史書佔畢中然三代前以子系字者
尚希而是時卽太子亦稱王子其謂王子喬者猶
云太子晉爾未必字爲子喬也旣周太子自應姬
姓何得以爲氏王傳中王卽吾姓之云蓋不得王

子二字之義而強爲茲說以傳會之耳今詩家稱
子晉者亦非二王喬並載於後參閱自明

王喬河東人也漢明帝時爲尚書郎出爲葉縣令
後天下王棺於堂前吏人推排終不搖動喬曰天
帝獨召我耶乃沐浴服飾寢其中蓋便立覆宿昔
葬城東自成墳其夕縣中牛皆流汗喘乏而人無
知者百姓爲立廟號葉君祠吏人所禱無不如應
元瑞上言飛鳥而此乃不記錄疏也按後漢書喬
爲葉令每朔望自縣詣臺朝帝怪其來數而不見
車騎令太史伺望之言其臨至輟有雙鳧從東南
飛來舉羅張之但得一雙鳧則四年所賜尚書官
屬履也每當朝時葉門下
鼓不擊自鳴聞於京師

王喬犍爲武陽人也武陽有北平山在益州南一百四十七里高一千二百丈上有白蝦蟆謂之肉芝食者長生非仙材靈骨莫能致也喬好道望山朝拜積十餘年登山感致因得食之身輕力倍行及走馬後爲相人令遂於東嶓山得道今武陽有喬仙祠王喬有三同姓名有太子晉王喬有葉令王喬食肉芝王喬乃蜀中神仙也又見太平廣記其謂三人亦不詳考王子喬非王姓也名疑云卽封禪書王伯僑麟按封禪書作正伯僑非王姓又御覽劒解門引道經云王子渤海之冢劒鳴空

櫛王喬景陵之墓劒飛沖霄王子者曾詣鍾山獲
九化十變經以隱遁日月游行星晨後一旦疾終
營冢渤海山夏襄時有發王子墓者一劒在此寢
上自作龍鳴人無敢近後亦失所之王子喬墓在
景陵戰國時復有發其墓者見一劒人適欲取視
其劒忽然上飛去王子喬事舊說浮邱公攜與乘
鶴共登嵩山此事又不同解化時年正十五六云
按此子喬劒解事頗新僻並著之所稱王子不知
何人其劒解亦與子喬相亂不可不知路史云王
子喬名超古字開山尤爲奇僻并附載

諡曰蔡邕集有王子喬碑云王孫子喬者上世之真人也聞其仙舊矣不知興於何代博問道家或言潁川或言產蒙斯邱傳曰王氏墓永和元年臘夜上有哭聲甚哀附居者登而察焉洪雪下無人跡見一大鳥跡後有人絳衣大冠呼樵孺子尹禿曰我王子喬也爾勿復取吾先人墓前樹也忽不見碑詞但稱其乘螭駕鶴並不及監撫世榮水經注言冢在梁國蒙縣碑題云仙人王子喬碑正載中郎文稽周室墳陵無在梁國者而此子喬姓王固非王子晉也高允王子喬行曰王少卿王少卿超升飛龍翔天庭少卿必

子喬字此亦姓王者王逸楚辭注曰崔文子學仙於王子喬子喬化爲白蜺而持藥與文子文子驚怪引戈擊蜺中之因墮其藥俯而視之王子喬之尸也置之室中覆以敝筐須臾而化爲大鳥開而視之翔飛而去蓋王子喬已有三矣真誥衆真集洞宮有桐柏真人領五嶽司侍帝晨王子喬注曰此稱眞人之字也則元瑞疑未必字子喬者殆未攷耳文選別賦注引南越志曰長沙郡劉陽東有王喬山山有合丹處杜氏通典曰昆陽城有古墓在東俗云王喬墓也斯復不知何真當與柏人葉令又別一人則王喬亦有

三也雖然葉令當顯宗時柏人令未審在何世顧爲
令長則亦漢中葉矣屈平遠遊曰吾將從王喬而娛
戲賈誼惜誦曰乃至少原之野兮赤松王喬皆在旁
淮南子曰王喬赤松子吹嘔呼吸上通雲天又曰王
喬赤松吸陰陽之和食天地之精蹠虛輕舉乘雲遊
霧屈生戰國之世二子皆產漢初所稱果何指也蔡
澤說應侯曰世世稱孤而有喬松之壽注曰喬王子
晉松赤松子案汲冢周書師曠謂子晉曰汝聲清汙
汝色赤白火色不壽子晉果十七而卒秦去髭王未
遠傳聞宜眞乃云喬之壽何也且亦未聞子晉之吐

故納新耽慕方術者以王喬卽子晉豈彭殤可齊乎
而諸敍王喬者皆與赤松並稱且不云松喬而云喬
松予意必先赤松而出者疑上古已有一王喬而書
傳不詳其事耳武陽王喬太平廣記無之胡氏誤也
御覽所引道經蓋出真誥真誥曰玉子者帝侑也曾
詣鍾山獲九化十變經以隱遁日月遊行星辰後一
日疾崩營冢在渤海山夏中衰時有發玉子墓者室
中無所有唯見一劒在北寢上自作龍鳴虎嘯之聲
人遂無敢近者後亦失所在也

帝侑則堯父
外書作嚳字

王子喬

墓在京陵戰國時復有發其墓者唯見一劒在室人

適欲取視忽飛入天中也案此則營墓渤海者當作
玉子非王子也玉子卽帝嚳名號亦奇御覽字多譌
王僑王子喬

楊用修云史記封禪書注引裴秀冀州記云緱氏
仙人廟者昔有王僑犍爲武陽人爲柏人令於此
登仙非王子喬也唐詩王子求仙月滿臺又云可
憐緱嶺登仙子猶自吹笙醉碧桃蓋世以王僑爲
王子喬誤也久矣

元瑞新錄曰史記封禪書宋毋忌王伯僑充尚羨
門子高索隱注司馬相如云王伯僑古仙人下復